

Nym Schwefel yn ein neuen hafē / vnd setz auff  
glühende Kolen / vnd halt den finger vber den rauch das  
er wol daran gehe. Odder brenn hirshorn auff Kolen /  
vnd halt den finger darüber / er stirbt on zweyuel.

### Zu der Brust.

Wem die brust wehe thut / der neme Cartago / ran-  
ten vnd rettig / ydes gleich / vnd stoss mit einander / las  
es yn sein eygen safft stehen vber nacht / des saffts isse  
drey tag / es hilfft. Ein anders.

Nym fenchelsamen / peterlensamen / rosensamen vñ  
zymet rinden / temperiers mit hönig zusammen / vnd  
mach ein Catwergen / der isse yhe gegen der nacht.

Ein anders.

Nym Kettig vnd Poley / sends mit wasser / saltz ein-  
wenig / vnd trinckts.

Wenn ein weibe die brüste schweren / odder  
das hertz wehe thut von der geschwulst.

Zermale Köl Kraut vnd salb dich mit dem safft / Od-  
der nym schaff mist / vud leg yhn warm auff die brust.

Item / nym hönig / milch vnd schmaltz / temperier  
das vnter einander vnd legs auff die brust / Trinck fast  
Bybenellen / das ist der brust gut.

Für die geschwer auff der Lungen.

Las von stundan die Epatica schlagen / vnd hüte  
dich fur essen vnd trincken / so viel es möglich ist / trinck  
kein wein / sondern mandelmilch odder wasser.

### Zu dem Leibe.

Thut dir der leib wehe / so nym wegerich gestossen  
vnd bind es darüber.

Wer ym leib von fallen odder stossen zubrochen were.

Send Künlen vnd trinck den safft mit wein.

Ob ynn dir würm das fleisch essen.

So nym